

գիւղի փողոցներում թափառող սովստանջների պատկերը, ամենուրեք թափառում են քաղցածներ, իսկ օրական մեռնողների թիւը շատ շատ է:

Ա. Գ Օ Վ Լ Ա Թ Ա Բ Ա Գ

Աոր—Ջուղայից գէպի արեմուտք, 16 Ֆորսախ հեռու, հարաւային սարերի փէշին, մի ընդարձակ դաշտի վրայ ընկած է Գովլաթաբադը. սա ուսեհներին և բարգիների տընկարաններով պճնազարդւած զուտ հայաբնակ մի գիւղ է, որի առաջ փուլած են արտերն ու արօտավայրերը: Գիւղի արեմտեան կողմում գտնւում է մի քարիզ, որի ջուրն սկիզբ է առնում սարի խորշերից և պտոյտներ գործելով՝ նախ անցնում է Գովլաթաբադ, յետոյ վազում է դաշտավայրերը ոռոգելու:

Գիւղը բաղկացած է 40 տնից 320 շնչով, որի 158-ը արական է և 162-ը իգական. նրանց տները շինւած են յարգախառն ցեխից, կողք-կողքի, իսկ փողոցները ծուռուծուռ են և կեղտոտ:

Հողը պատկանում է Ձէլէ-Սուլթանին. գիւղացիները հողազուրկ են, նրանք մշակում են աղայի հողերը և բերքի $\frac{2}{3}$ մասը տալիս են նրան (սերմը աղան է տալիս): Բացի այդ՝ 160 թուման էլ պիտական հարկ են վճարում:

Գիւղն ունի մի եկեղեցի Ս. Աստուածածին անուանով. դպրոց չունի, եթէ ի նկատի չառնենք այն, որ երկու տարի առաջ եկեղեցու բակում սովորելիս են եղել 20-ից արեւի երկսեռ աշակերտներ:

Գիւղից հեռու, Շիր-սէֆիգ սարի լանջին փուլած են Գովլաթաբադի այգիները:

Այս գիւղը 1916 թւին ենթարկւում է տնտեսական ծայրայեղ քայքայման Բէգախան մեծ աւազակապետի կողմից. նա իր զինւած ձիաւոր խմբով երկու անգամ արշաւանք է գործում գիւղի վրայ և առնում է 1288 թուման